



Ханты мир ураңан актам волаң нэпек

Там тал питцам вур элты кашң хоят верытас «Араң, монцаң, потраң ёх» луңтап ёшан каталды, луңатты. Аратал ханты мир ханшам потрат, арат, йис потрат, монцаң хол ияха Зинаида Викторовна Лонгортова акатсалды.

Мет олаңан там волаң нэпек Ырвош районан улты хоятлув ёша пайтсалдал. Ай кер тылаңан АНО «Ямал-Медиа» онтасан луңтап Питдоран, Ырвошан, Ващёханован, Мужийн, Асован, Горка вошан, Ыркуртан эталтаса. Кашң куртан нэпек луңатты хота хоятат ёхтыдысат, Зинаида Викторовна пилан потрэмисат па луңтап ёша моцатысат.

Хоты сахат там луңтап верты номасан ёхатса па верал патёл унты тусды, щит элты Зинаида Лонгортова ясаң тус: «Ма хуван нумассам, ханты мир потрат, монцаң, арат хол йи нэпека акатты. Журналист, редактор па режиссёр верэм тувман, ма кашң пуш нумассам, мира эталтыты нэпек щиран муң ханты мирэв юкана этты нэпек шеңк шимал. Шеңк ар нопсаң, араң хоят щикунш ул – туп тухал хоятлув хонна округ доватан ант уйглайт. Хун там рупатаем питцасэм, ма хонна ант па нумассам, муй хорпи ун рупата тыйл.



Хор: Зоя Курьямова

Зинаида Викторовна лув ёра кашң ай курта луңтапал тутдылды.



Ёмвош округан щикунш ар луңтап элдыйл, туп муң унтэв ар пелкал ант ёхтыдыйл. Куртан улты хоятлув щита этты нэпекат ёша паятты ант верытлалдал. Интернет щикунш ул, щит мохты рахал там йисан нэпекат луңатты. Туп, антом кашң хоят щи мутра тайл. Щи тумпийн хун нэпек ёшан каталдэн, лыпен аматан ёхатла. Луңтапен нэпек лопаслал тыел-тохел поныдыдан, туңа-щира вантыдыдан.

Хун ма Ёмвоша яңхсам, щита нэпек ханшты хоятат пилан уйтантысам. Кат пуша ханшты хоятлам аршака йисат, ванты щи арат тал элты ялап хоятат ханшты, арат арыты питсат. Рутлал-сырлал элты хулдыйм потарлал нэпека ханшты питсат.

Ун пумащипа вутщилам ястаты щи хоятлама, хой кашащас манэм нётты там вуясам верэман, щит: Е.Д. Айпин, Р.М. Потпот, М.А. Рочева, Р.Г. Решетникова, О.Н. Пандо, Т.Г. Кутюмина, Л.Г. Логинова, Л.Т. Гурьева, Е.Т. Федотова, Н.Н. Истомина, С.В. Сметанина, щи тумпийн ОЦНК па И.С. Шемановской хоца рупитты хоятлама. Щалта па атэл пумащипа, хой потрат там «Араң, монцаң, потраң ёх» луңтапа лоңксат.

Зинаида Викторовна Ырвош па Кев сыл район тумпийн хонна Екатеринбург, Ёмвош, Хон Петра, Нижний Тагил па Тарко-Сале вошата яңхас. Щита улты хоятат пилан уйтантыйс, ялап этам луңтапал мойдыдыйс. Щи веран аратал хоятан ханты мир антология ёшан катдыдыса, луңтыдыса.

Ханты ясаң ант моштаты хоятат ураңан потрат руц ясаң толмащман улдат. Щи веран лув аршак ханты мир, ошаң-нопсаң хоятат элты уйтты питсат, ханты мир лыпи щаци лоңксайт. Мохты щи лув па сэман хантэт педа вантты питсат. Зинаида Викторовна онтасан нох адмиман тайдаюв, тэпидаюв. Щит шеңк тынаң. Щипан, па мир кутан ант ушлув, муң хорасэван, ямеван елды уллув.



Хор: Зоя Курьямова

Асов куртаң мохилад пилан уйтантымалан.

Алина Тоярова ханшам потар

Сотмет талал постаса

Хашам шутцаты хатадан сот тада йис, хоты Пулцават вошан Ямальской опытной станция тыйс. Там мет олацмет организация Овс муван. Ши пораятан тата улты хоятат нёхийн па муван энмалты лэвпасатан иса талац тэдан тармилдысайт.

Обдорской ветеринарно-бактериологической институт кушья Сергей Александрович Грюнер ус. Ши порайн хут-лапат хоят рупитас, ши тумпийн 3-4 хоят командировкаята яңхас. Яңхасайдал 1,5 тал кеман усат. Институтан вой леккарат, фельдшерат, йи ясаң элты кимет ясаң толмацты хоятат.

Там йисан еша па щира питса. Александр Александрович Южаков сельскохозяйственной наука доктора ул, лув ясаң щират: «Там хатлатан ЯОС хоца луңтасты тащ хонна ул. Аратадан нийлсот молтас вуды. Хутъяң тал ши тащ учёной хоятатан Хон Петра вош, Москва, Тюмень па ЯНАО элты вантман тайла.

Тайшин рут хоятлув ши веран муңева иса нётлат. Ветъяң молтас тал муң ияха понаман



рупитлув. Там пуш муң щират тылащ рупитсув. Вулэт хора вуйдысув. Артадасэв, хоты рахал искусственной интеллект пидан елды рупитты».

Щишан, муң ищи там волаң вер верты хоятлува мойлапса ясаң китлув. Елды тумтака



Хор: Александр Южаков



Аллина Тоярова ханшам потар

Шоши мир няврэмдува ялап нётоса

Овс мув шимлаң мир няврэмат ялап нётосайн маты питлайт. Нийлъяң щёрасан мадайт ши няврэмат, хой велщи ашкулда юпийн ун тахайн уталтыты питас. Ши вер «Дорожная карта КМНС» хоца доңалда.

Йи пуш маты ох верытлат ёша паятты ши няврэмат, хой очной щират уталтыйд. Лув улты верэд ул шимал ох ёхтапаты семья элты муы па аңкидал-ащидал касдыман яңхлат. Ши охладан верытлат хот митэл,

тыел-тохел яңхты юшел сохапаты, луматты сох па уталтыты щира мосты пормас лутты.

2025-мет талан Гыдайн, Белоярскаң па Мыс Каменныйн 6-7 тал доват няврэмат ураңан ашкулдая лэщатыты харат вердайт.

2025-мет тал вуш элты хот миталаты ураңан мийлыты 25000 солкува велщи рупатая этам няврэмата маты питла, куш хота лудан лув ант рупитас.

Аллина Тоярова ханшам потар

Тал худ мощатты питса

Еша улты Ямал доватан аратад ёханат еқкан ши суктадайт. Худ велпаслаты ёх, па хой лаңхаман худ велпаслаты этдыйд, ёханата ши арадалат.

Соцсетят хоца ин хоятат мощатам хулдал пидан хор понылылат. Щишан, нын еқк элты пуромтан елпийн нумасаты, така йис муы антом. Лэваса ёхана ал

этдыяты. Нын дылдан, па ванан улты хоятдан элты нумасаты.

Хонна талаң тал, ши веран тал сыс мощатты худан ант шимлапал. Хой ой тайл, ищиты холпа муы па няшия хойл. Тумтак ёш, тумтак кур! Хурыман улты, атом ята ал питаты!

Аллина Тоярова ханшам потар

Хонсяпса элты хурыяты

Ямал мув хуват лапатъяң нял сёрс няврэм па катсот яң сёрс ун хоят грипп элты портунан понтсайт. Леккар хотан рупитты ёх холна сот сёрс молтас хоята портун понты утсидат.



Там мосванан округева худмет пуш грипп элты 93,5 сёрс «Ультрикс Квадри», «Совигрипп» па «Флю-М» вакцинайт тусайт. Ялпа туты портунат куртат хуват китлайт.

Портун понты вер – сит хоятат хонсяпса элты шавиты мет ям вер. Леккарат хоятат шавиман тайты пардайт. Мет олца пирась хоятат, няврэмат па муш тайты ёх укол верты вохлайт. Хонсяпса кеншак манты ураңан, леккар хота портун понты яңхаты.

Альбина Тырлина ханшам потар

Лялясты мохилув няврэмат мойлаптадайт

Ялап тал емаң хатлат унты СВО хоца улты мохилув няврэмат мойлаптадайт. Ямалан 5000 солкувайн 3000 молтас няврэм мада.

Там пуш, па регионат элты лялясты хара манам хоятат, хой семьяйт округан улдат, ищи мойлаптадайт. Иулты холдыена, хой нэпекат соцзащита хоца доңалман улдат.

Ван хатлап 31-мет хатл унты мосал утхота яңхты ши хоятата, хой нэмат щий ант доңалсайт. Ван хатлап 1-мет хатл элты округ соцзащита департамент сайт мохты заявление китты рахал.

Аллина Тоярова ханшам потар

«Большая перемена» касапса манал

«Большая перемена» хон мув уйтантапса нийл класс элты яң класс унты ихосьяң округ няврэм манас. Сита лув арсыр касапсаятан каслат, еңта пасан суран уйтантапса на лувилдал эталтылат.

Касапсайн сёрс ветсот няврэм яха акташийс. Уйтантапсайн верам ятат хоттэл Тада постаман усат. Очной сирн нох питам эвет па похат эталтаты рупатайдал хоттэл хоятат, улапсайдал, сирдал-пищдал элты ханшсат.

Няврэмат катхосьяң направление элты йи пирыйм направление хуват каслат. Яңмет классан уталтыты ёх, хой си касапсайн нох питал, йи миллион солкува ёша паятал па елды уталтыты манты ураңан баллат шитал. Призёрат – катсот щёрас солкува. Си арат охан холна нийл

па яртъяңмет классан уталтыты эвет па похат, хой одаң тахая элдат, мадайт. Призёрат сот сёрс солкува ёша паятал.

Волды нох питам няврэмат проект партнёрат элты: ОАО «Хон мув карты юшат», «Росатом» па «Роскосмос» Госкорпорацияйңан, Сбербанк, VK мойлапсаятан мойлаптадайт. Си тумпийн, няврэмат уталтаты хоятат образовательной программа сирн уталтыты верытлат па сот ветъяң сёрс солкува шитты.

«Большая перемена» – сит ашкудайн уталтыты няврэмат кеша мет волаң дэсятм проект. Округ кусяев Дмитрий Артюхов «Энамты ёх па няврэмат» направление хося РФ Госсовет кусяя ул. Кашң тал си касапсая ёхтылыты финалистат пилан уйтантапсат.



Хор: Наталья Иванникова

Вет няврэм округ губернатор грант ох шитсат



Хор: Альбина Тырлина

Ошаң няврэмат премия шитты ураңан округ губернатор нэпекат дэсятас. Грант охал сот сёрса хойс. 2024-мет талан лауреатата ювам Пулцават, Тарко-Сале, Ноябрьск, Новый Уренгой па Надым вошат школа искусств ашкудаята яңхты няврэмат премия шитты питсат.

Округ, хон мув па па мув культура сирн манты конкурсатан па фестивалытан ёнтам холдыена няврэмат нох питсат па призё-

рата этсат. Симась нётапса 2012-мет тал элты мада. Си тумпийн, кашң тал детской школа искусств хольмаң мет ошаң няврэм вет сёрс солкувайн сохатпалайт.

Округеван там тал няврэм Тада постаман ул. Школа искусств хотат ялпитты тумпийн, ялап пормасат па кат сёрс ялап нарас юхат лутсайт. Хон мувеван нарас юхат верты хотат пилан нэпек дэсятман ул. Холна сёрс ветсот симась пормас округ ашкудайт ураңан лутлайт.

Вуды нёхи дэсятты ялап хот пуншса

Вуды нёхи дэсятты ялап хот Тазовской вошан пуншса. Си хот омасты ураңан округ элты ох эсалса. Сита антом туп нёхи вудла, вуды нёхи лётот верты па пилта.

Си хотан тал сыс лапатсот тонна унты нёхи дэсятда. Ар хорпи колбасат, поталтам лётотат, карты хошапа дэсятм, соралтам па тут пусаңан восытам нёхи верда. Си

тумпийн су-вид сирн верты нёхи эсалты па пилта.

«Хун симась тахайт пуншлайт, кашң порайн куртаң хоятат рупатая вудайт, вуды нёхи элты аршак лётот верда. Тал сыс ветсот тонна унты эсалда. Хасям тал элты, яң пуша аршак», – Тазовской район куся ху Виктор Югай ясаң верас.

Ин округев хуват нядхосьяң симась хот рупитал. «Тазовские олени» хот тумпийн, Пулцават вошан «Ямальские олени» па Харп вошан МУП «Паюта» вуды нёхи дэсятты хотатан вуды нёхи тумпийн тащ лэты сирн нёхи верты пилта. Сишан шоши мир хоятлув аршак вуды маты верытлат па аршак ох ёхтапаты.



Хор: ЯНАО губернатор пресс-служба

ОБЪЯВЛЕНИЕ

СЛУЖБА ПО КОНТРАКТУ В ВС РФ

ПОЛНАЯ ИНФОРМАЦИЯ ПО ТЕЛЕФОНУ **8(902)81-6-11-90**
ЗВОНОК ПО РОССИИ БЕСПЛАТНО

ВРЕМЯ ДЛЯ ВАЖНЫХ РЕШЕНИЙ!

КОНТРАКТНАЯ СЛУЖБА
5 000 000 Р
ЕДИНОВРЕМЕННАЯ ВЫПЛАТА
2 300 000 Р

ПРИ ЗАКЛЮЧЕНИИ КОНТРАКТА НА ЯМАЛЕ

Прибывающим с других регионов, возмещаются затраты на проезд от места проживания до г. Салехарда. В период оформления проживание в г. Салехарде бесплатно, 3-х разовое бесплатное питание!

ОБУЧЕНИЯ:

- ✓ ОПЕРАТОРОВ БЕСПИЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ
- ✓ МЕДИЦИНСКАЯ ПОДГОТОВКА

1 900 000 Р ЕДИНОВРЕМЕННО ОТ РЕГИОНА
до 120 000 Р СЕРТИФИКАТ НА РЕАБИЛИТАЦИЮ

400 000 Р МИНИСТЕРСТВО ОБОРОНЫ
ЗАКЛЮЧЕНИЕ ВОЕННОГО СОЦИАЛЬНОГО КОНТРАКТА

ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО

РЯДОВОЙ ОТ 210 Т.Р.
СЕРЖАНТ ОТ 232 Т.Р.
ПРАПОРЩИК ОТ 292 Т.Р.

Аган куртаң верантты ими



– Ма сусн 1954-мет талн Сурханл район Рускинской куртан сәма питсам. Ма Рускин ханты рут элты йидам. Аньтем Евдокия Дмитриевна (эви опрацнэмл Тайбина), ащем Василий Иванович Рускин усқан. Ын хул, вой велпасласқан па вулы тац давалсаңан. Муң семьяев ар няврәмаң ус, ин шимд хоят хащас. Павел ащем Рускинской курт пуналн вут куртан ма вулыдам давалман ул. Олаңан аньтем антома йис, щалта 1995-мет талн ащем хув паната шушмас.

Ашкуда унты вут куртэмн энамсам. Щалта тохдаң хопн Рускинской курта ашкуда тусайм. Щита интернатн удмемн нулевой классан уталтысам, руц ясаң иса ант тайсам, щипн еша лаварт ус. Ма туп хулам класс етшаптасам, елды уталтыты ант лаңхасайм, щипн аньтемн-ащемн ёхи тусайм. Ма дынана нётсам.

Щалта уна йисам. Иван Семёнович Покачев хоца мантсам,

Нижевартговской район Аган куртан удмемн ма Анна Васильевна Покачева хоца мойңа яңхсам. Лүв Лидия эвел па хилдылал пилн щутщаман ул. Лүв улапсайд элты айкел тус.

лүв Аган ёхан муваң ху, щипн 1978-мет талн Рускинской курт элты Аган курта касалсув. Хулам няврәм сәма питас, ин Лидия эвем туп хащас.

Елды Анна Васильевна Аган курт элты потартас. Лүв ясаң элты оша йис, хунты хувн тата ханты Покачеват рут ёх усат. Мет олаңан 1893-мет талн там курт элты нәпекан ханшса. Щалта айлтыена тый руцат ёхатсат па 1920-мет талн утхот верса. Олаңан щип курт Сурханл района лоңман ус, 1976-мет талн лыпат хойты тылац 24-мет хатл вуш элты Нижевартговской района маса. Щип порайн тата хул велпаслаты таха, совхоз па па тахет рупитсат. Ин тата нялсоткем хоят ул, щип кутн катсот ханты па хускем ёрн мир. Аган курт пуналн мув илпи питы вой вуты таха рупитл,

щипн куцайт охн нётлат хатнәху улты па мосты хотат омасты.

Тый касалман Анна Васильевна арсыр тахаятан рупитас: совхозн, хул велпаслаты тахайн, певалты хотн, катра пормасат давалты хотн. 2008-мет талн «Центр национальных промыслов и ремёсел» таха пуншам порайн лүв щип рупитты манас. Тата лүв куртаң мир, няврәмаң шоши мир йис верата па арыты, якты уталтас. Елды тата хот давалты нәңа рупитас. Щип юпийн щутщаты манас. Вут куртан вулы тац давалсат.

Анна Васильевна хилдыдала хорамаң ханты лүматсохат ёнтал, товийн тонты хорл, щалта арсыр хошапат верл, нохар юх ләрат элты ищип хошапат сәвл. Лүв ястас, иса ими верата лүв аньтел, аңқаңкел па щашел элты уталтыйс. Анна Васильевна эвел

ищип арсыр мосты верата уталтас, ин Лидия Ивановна Яскевич эвел ищип туса верантты имия ул. Щип тумпийн Валентина Бычкова хилдәңал иса хошл па ин аньтел пилн шоши мир пормасат верты хотн рупитл. А.В. Покачева лүв порайн унта вонцамотат, толхат, нохар акатты яңхал.

Лүв щиты Аган курт улапса элты ястас:

– Аган – хорамаң па сыстам куртые. Культура хотн рупитты ёх емаң хатлат ләщатлат, щип «Нижевартговской район – щип ма самем», Сус емаң хатл, щип тумпийн шоши мир «Ворңа хатл», «Вулы давалты, хул па вой велпаслаты хатл» па па емаң хатлат. Лүв порайн Аган ёхан хуват ай хопаң касопса улдыыл, елды мет туса довалты хоят округ касопсая Ёмвоша манл.

Ям арат тал Аган курт куцаят Татьяна Семёновна Соколова ул, лүв иса муй верл, лүвн куртан мир яма ат ус. Ар тал курт элты Лаңки пос вош унты машинайт яңхты кев юш верса. Туп и нуша – товийн щип кев юш йиңкия йил. Там куртан олаңан ФАП ус, ин ар тал амбулатория хот рупитл. Лаварт муш пилн хатнәху тохдаң хопн Нижевартговск воша тула.

Анна Васильевна тыштоман ястас, ям арат тал ёхды ашкулдайн «Ханты ясаң» урок йира вуса, щипн лүв ай хилдылал ин рут ясаң ант тайлат. Туп лүв Люба па Дуся ун хилдәңдал холна ашкулдайн ханты ясаң уталтасқан, щипн еша потартты хошдаңан.

Ёхи хащам артан Анна Васильевна Покачева ястас, ям арат тал ёхды «Ханты ясаң» газетаевн сурханл ханты ясаңан ханшам потрат луңатты мосман тайс.

Людмила Шульгина
ханшам потар



Грант ох сытта веритлат



Хор: Антонина Шашко

Муң региону хуват ропытты соцпредприятият грант ох сытта веритлат. Ши ораңна Ас патты тыдац хутмет хатл маса заявка китта масл. Нох этты предприятие нэмаг ван хатлап тыдац алаң хатлатна лавдайт. Ши грант ясна пайтты ораңна каста веритлат ай па средний бизнес тайты нэңхэт хой касты харатна ропытл, леккар хатна, вул нэңхэт мала хоца ки онттал па нявремат ораңна шутцаты харат лэцатл.

«Тамац региональной нятапсы муң хоцев топ ол, Россия хуват йи щимац аналог харты

антам. Тамац па па мета маса нятапсэт Ямал элты мули вет талд сис Минэкономразвития со-

циальной предпринимательство хоца нятлат», – Ямал мув экономика департамент коца лацкар ху Илья Розманов лавас.

Щимац грант предприятия элты мала, хой верты бизнес-проектал хоца лув охлад нята веритл. Касты хара сытты охат каман рот цель хоца китта рахта питлат: аренда, связь, ЖКУ сохаптата па ремонт верта. Ши томпына, хой сосылдыта ант веритты нэңхэт машинайна тотлиты вер тайл, грант онтасна ши ораңна нэман верам пормасат лотта веритл, медтехника ораңна запчасть па комплектуюцийт, пеңк верты пормасат.

Щимац региональной ох нятапсы Ямал мув нэңхэт элты олапсы ямми верта нятл. Предприниматель касты хара верам условияйт вантта па заявка китта личный кабинет хуват «Мой бизнес» ЯНАО сайт хоца веритл.



Хор: ИА «Приуралье»

Ямал мув ор ваят партонна масайт

Ловатлна нийл щёрс партон доза лэцатса. Щилта нил щёрс вакцина – сус сис, вай леккарат па ор ваят савиты нэңхэт Приуральской район оратна па Обская-Бованенково, Пулцават-Надым ёс сылатна понтсат.

«Щимац вакцинация ор ваят бешенства эвалт савиты ораңна верса. Лув дыты щирна верман ол, хоц сукатам лов рав па худ лант эвалт, вой па парафин. Ваят ораңна нэмоса атам ант верл, сэңк такан авал, ваят эвалт педа йидат, приманка юхы дылэл, ши ораңна талд сис бешенства мосна ант мосмалат», – Ямал мув вай леккар хат коца Евгений Попов лавас.

Лэпкат, охсарат па па ор ваят партонна матэт ораңна, сельскохозяйственной па ялан тайты ваят ант питлат лув эвалтыдал мос юхы талта.



Мув вантман яңхты нэңхэт Пулцаватна акатлайт

Мув вантман яңхты нэңхэт 2025-мет тална Ямал мувна акатлайт. Ши уйтантопса нэмаг «Больше, чем путешествие», Пулцават васна манта питл. Ши онтасна мув вантман яңхты энамты нэңхэт ораңна география энамл, отрасль па экологической ответственность педа мет такан вантта питлат.

Ловатлна, ши форум хоца хутсат нэңху уйтантыйл, лув кутлална туристической отрасль эттады нэңхэт, исполнительной власть коцайт, «Проводники смыслов» хоца лайты нэңхэт па Росмолодежи «Больше, чем путешествие» участникат, блогерат па па атат.

Папус верты форум мет алаң пус кат тематической сменная манта питл. Алаң сменная профессиональной сообщества нэңхэт: гиды, туроператоры па экскурсия тутытат. Кимет смена па касад дытты нэңхэт ораңна питл, хой элты мув вантман яңхта омац па энамты нэңхэт туризм. 2024-мет тална Ямал мувна талд хуват ропытты энамты нэңхэт образовательной центр пунсса, лув энамты нэңхэт туризм па гостеприимство педа онтталды. Ши центр каман рот онтыды программат верл, топ лув энамты нэңхэт тотлиты, проводник-гидат па экскурсоводат.



Хор: ИА «Приуралье»

Нэпеклад туңа-щира лэцатта пардайт

Худ велты па тац савиты нэңхэт нэпеклад туңа-щира лэцатта пардайт. Сусн, ёңк лайтал юпина кадаңаң нэңхэт тал лайты тахайл педа йита питлат, худ велты ях па хаплад вуты талдаллал. Щитна, хой нэпеклад лэцатты вер, леккар хатна яңхты номсат тайл, верта веритлалдал.

«Ма лолан дытсам итта нэңхэт, хой касдыман яңхал, худ ведал нэпеклад туңа-щира лэцатта вахта. Луң сис лув орциладна сэңк щёкат пора, хой хувви касдыйл, луң сис щимац ком ант тайл, худ велты ях па, худ маныты сис нэмагтыт па вер педа номас ант тайл. Хой мала-мала муниципалитет хоца луңтасл, масл щита олты конторайна манта. Муң Приуральской район нэңхэт Охсар похална лаялдалду. Каман хорпи верат одлилат, хой ның вус, хой няврем тайс, щит аса муң хоцев нэпекна лэцатта масл. Муң хоцев ки щимац верат ант ханста, муң ант питлу оцта, хой мала хорпи нятапсына лэцатта», – Приуральской район Агропромышленной комплекс коца Юрий Лаптандер лавас.

Еша нумасаты, цифрайт пидан ёнтаты


Йис пора эдты хоятат луцатты вер тайсат. Монцат, луцтарат, амаматщет па арат дыпийн молты цифрайт иса удлат. Ин па электронной щиран шеңк ун цифрайт луцатдайт, тухал отдал ханшты щир идампа ант тайлат.

Там лопасан велци ашкулдая манам няврэмат кеша рупатайт понтсув. Еша нумасаты па мосты цифрайт тал клеткайт дыпия ханшаты. Щи тумпийн нумадмияты, муй щирн ханшам цифра ханты ясаңан ястада.


Амаматщет ханятам ясңат моштаты па цифра нэмат щита уйтаты.

Зоя Куртямова лэщатсалды

Хор: stylshbag.ru



...	нох вуты		питл =	8 (нийл)
эдты	-			
нох вуты		питл =		нох вуты =
-				питл =
		7 (лапат) эдты	нох вуты -	питл =
питл =				питл =
9 (яргъяң) эдты	нох вуты -		питл	6 (хут)



Амаматщет!!!

- Кат хот кутан лавми ухал талдыда. (швгощ)

- Сот ху йи осам хир эдты олдат. (нлш лох лъввщ)

- Нум пелакан сот, илта пелакан сот, щи кат кутн хоят яңхал. (лох)

- Лапат парщ олаң нэ. (ими ввщпщ)

- Кат кутюв икеман хухалдатан. (нннлп лъхл)

- Йи хоятал туп нох килал, си кут кимет икел мув лап дарытты сонтамал. (нвэлп п ллт)

- Хут юр мара хухалты вулы, Лапат юр мара нэхапты кадаң. (вот)

- Сот хоят - йи ёш. (ов нур карты)

- Мув сот сэм, вур сот сэм. (вурты рых)

- Сот ху йи осам. (лат)

- Кат ими вет пох тайлаңан. (вщат, луйт)

- Йи ху шушам юшал хуват еңта анат омасмал. (курун вой калгъамал)

- Нял эви йи ермак охшам понмел. (нвсан)

Ястаты, муй арат па муй хорпи худ па вой тата уд.

Хор: stylshbag.ru










Муй арат худ хоран альман уд? Луңталан. Муй хорпи худат тата удлат, ханты ясаңан нэмлал ястадан. Тонты хошапа акатты юпийн, муй арат худа йил?

Войт па хошапа акатты мосал. Муй арат вой акмас, луңталан. Войт нэмлал ханты ясаңан ястадан.

4 (нял)	нётты +	3 (хулам)	питл =	
нётты +		нётты +		нётты +
	нётты +		питл =	
питл =		питл =		питл =
	нётты +	8 (нийл)	питл =	14 (нялхоцъяң)



Тасэң пёрас қө, тасэң Пэтэр, тасэң Морка

СУРГУТСКИЙ
ДИАЛЕКТ

Там монц Дмитрий Антонович Кечимов (1960 – 1999т.) монцильйис. Уйт лортылащ 1996-мет талан монцаң хуев хотволан. Имохты щита нэпека ханшты питса, щи юпийн Будапештан Людмила Николаевна Каюкова ай тахайт потты тылащан 2010-мет талан щи рупата талаңа верты нётсаллы. Марта Чепреги венгерской, английской па руц ясната толмашсаллы.

Эй вочнэ чăқа Пэтэр вълл. Тасэң Пэтэр вълл, тасэң чёрас қө, тасэң Пэтэр. Му въллалнэ-қолталнэ, чу ким кэңар йохнам лэхпил атэм, ампэт тайал, ваналта кэңар қө мөнөл кунтэ, амплал илэ асэллал, ампэтнэ кэңар қө чық һащэхтэли. Му ким тасэң-ваққэң, нэнам-қонам лэйэлтэ кичэл антэм.

Эй мэта латнэ чу вочнэ въллалнэ Воч-лөқ-пухэл-лөқ-пырэс-имихэн-икихэн чăқа пăх тейхэн. Му пăх теймин чăқа, чуминт ныпэкнэ... ныпэк ёйахтэккэн. Пăх теймин пырнэ, а Тёрэм Қона тувэттэн чăқа. Тёрэм Қона туйи. Ныпэк ёйахтэх чăқа. «Ми пырэс имихэн-икихэн пăх чи Пэтэр тасэң-ваққэң қота ымэл, Пэтэр аби въл».

Мăқа чу, ёттэ, чу йасэң кунтэхлэх, чёрас қө һавмиллэ:

– Мут мўв йасэң? Ма, – йастэл, – кичэм антэм, – йастэл, – Воч-лөқ-пухэл-лөқ-пырэс-имихэн-икихэн пăхнэ тэм тысэм-вахам тайтахэ. Мўв йасэң?

Мăқа Воч-лөқ-пухэл-лөқ-пырэс-имихэн-икихэн пăх мўв қөв анмэл, қөв мўв анмэл, ай мэта латнэ, чу въллал латнэ, па

қатлэ върли сөчэмтэ лөвитхэ йэх, қөвэлтэ лөвитхэ йэх.

Эй мэта латнэ чăқа, йаңқтал-мэнталнэ, Воч-лөқ-пухэл-лөқ-пырэс-имихэн-икихэн пăх ёт ёйахтэх, пырэс ики ёйахтэх, пырэс икэли. Му пырэс ики ёйахтэмал чăқа йэхиллэ:

– Воч-лөқ-пухэл-лөқ-пырэс-имихэн-икихэн пăх! Нўн мўв қөв анэмлэн, энэл қөхэ йэхэн, нўн қөлнам мэнлэн?

– Эй, – йастэл, – ма йантэхмин қөвэтлэлэм.

– Мăқа йантэхмин қөвэтлэлэн, нўн. Ма чăқа нўнат чиминт ныпэкат мэлэм, нўн, та, ёттэ, тэм ныпэкэ тувэ, панэ ёттэ, тэхэ мэйэ. Нўн йаста, ёттэ, там тэм ныпэка қанчмин, нўн лўв авил въллэн, вөңкэ йэлэн.

Йа, чăқа, чу тасэң чёрас қө Морка йăқэн антэм. Тэхэ чи йөвэт, чө ампэт ай сөннам нэвэрлэт. Ми ими йастэл:

– Қөты йэхэн?

Муньпэк тэхэмейтэх, чу имином тэхэ мэй, чăқа, чу имино лөңтэхты, тэми чу ныпэкнэ тэхэн қанчмин, тэхэ чăқа, ёттэ, тэм тасэң қө Морка қанчэм ныпэк: «Ими, сорха лăйха лăйха, ма пэрхи йөвэттамнэ – ёттэ – пори личата! Пори пэсан ымтытэх, вэритэх! Ми қатэлнэ ма пэрхи йөвэтлэм, ма пэрхи йөвэттам қатэлнэ нўн пори улэнтэ! Воч-лөқ-пухэл-лөқ-пырэс-имихэн-икихэн

пăха авимэн тэхэ омэтлимэн. Ма йөвэттам латнэ ма пэсан вэр ымэттахэ, пори ымтахэ».

Мăқа чу ныпэк чу мейтэх. Му имихэн-икихэн пăх тэхэ мэн. Ими йастэл:

– Нўн мэна, чу қатэлнэ тэм кэнчлэ.

Мăқа чу имихэн-икихэн пăх ай мэта қатэлнэ чи кэнчи:

– Мăқа йўва! Упэн ики тэм қатэл чу йөвэтл.

Пори улэнталнэ, панэ тэхэ чи мэн. Тэхэнэ чи ымэл, чăқа мэта мэрэ вөли тасэң чёрас қө Морка чэнэ йăқэнам лăңал.

– Тэми вэлэ мўв чўксэңкэ питтэх? – Ими һавмиллэ:

– Нўн вэлэ, тэхэнэ қанчэн, – һавмиллэ, – ныпэк тэтты, тэхэнэ қанчэн, там, ёттэ, ма йөвэттам мўртнэ пори-мэтали вэра, личата.

Ма тэм йөвэттам латнэ пори пэсан сар омэттахэ. Воч-лөқ-пухэл-лөқ-пырэс-имихэн-икихэн пăха авэмэн тэхэ омэтта.

Тасэң чёрас қө Морка һавмиллэ:

– Мут мўв йасэң, нўн қейахинэ пиртэ авэмэн тэхэ мэта. Воч-лөқ-пухэл-лөқ-пырэс-имихэн-икихэн пăха мэтахэ қейахинэ пирты.

– Кэш, ныпэкэ тэтты, вөлэ.

Му ныпэк лўваты чи мэйи, лөңэтта вэртэх, чопэңка, лўв қанчэм ныпэкэл. Энтэм тохи энтэ тайал. Мăқа тыстэл, чэка пит. Му ымлэт пори вэртахэ, панэ авил тэхэ чи умэттэх. Нăмэксэхэл, мўв ура вэрлэм.

Нăмэксэхэл, чу мунт ура вэрлэм, ма чăқа ёттэм, сар, Антэрап чорэс тэм палэкнэ ёт вэллэ, Савэр Войэх Қон вэллэ. Ма тэхнам китлэм, чи имихэн-икихэн пăх. Ма тэхнам китлэм. Кунтэ пэрхи энтэ йөвэтл, тэхнам киттэ йох пэрхи энтэ йөвэтлэт.

Йа чи, тэхэнэ чи ай мэта латнэ һавмиллэ:

– Йа чăқа, вөңэм,

– йастэл, – нўн, ма чу мэта, ёттэ, ма рăпета тайлэм.

(Елды
па ул)



Ернас ёнтты ураңан арсыр рупатайт верты мосл

Щиты ястас мари мир ёнтасты нэ Эмма Анатольевна Семёнова-Гришкина – лув «Муро сем» («Ар сов») тахайн арыты, нарасты па луматсох ёнтты нэңа ул. Мин Марий Эл мув Моркинской район Шереганово курган уйтантысман па потартсаман.

Лув 1965-мет талн мари мир семьяйн сэма питас. Айтэлн аньтел элты арсыр ими верата па ёнтасты уталтыйс. Рупата щирн ёнтасты нэңа ул, щи вера уталтыйс.

– Ванты, мари мир ернас ёнтты елпийн арсыр рупата элты потартты ки, мет олаңан товийн лён сэмат мува омасты мосл, щалта энмалты, сусн щит эватты, акатты, щалта лён торн элты щашкан верты. Муң щи патыйн нэман станок тайлуд. Ма аңқаңкем, щащем па аньтем элты щашкан верты уталтысам. Ин ма «Муро сем» арыты-нарасты тахаева яңхты икета, имета, няврэмата мари мир хорамаң ернасат ёнтлам. Ма, ванты, йис щирн ёнтлам. Мет олаңан катра пормасат лавалты хотатн вантсам, муй щирн катра порайн ёнтсайт. Тухл ишн имилуд аньтидал элты хайм ернасат тайлат. Щи тумпийн па культура хотн кружок тулам, эвет ёнтасты па па ими верата уталтадам. Муң удам якты таха элты хайм луматсохат ищи

лумтыдылуд. Щитат шавиман тайдаллуд.

– Наң хун «Муро сем» тахая ёхатсан?

– Ма 2012-мет тал вуш элты «Муро сем» тахайн арыдам па тумырн (мари мир барабан) нарасладам, щит Пётр Павлович Ячекин верас. Айтэлн нумлэм, муң семьяевн кашң порайн емаң хатлатн муй торн сэварман арысат, щипн ма арыты вер педа самаңа энамсам. «Муро сем» таха ун хоятат хунты рутлал элты арат холыена нэпека ханшсат, щитат ин арылуд. Сергей Александрович Викторов пилн ванан улты куртат хуват яңхилылуд па йис арат диктофона па нэпека нох ханшлуд, щалта уталталлуд па арылуд. Куртата етнхот альман яңхлуд, лувилала умащ акмам арат худантты.

– Алпа, наң ёнтасты нэ иты арсыр ванлтопсэта яңхлан?

– Па муй. Ма рупатаем куца ху иса порайн манэм щимащ ванлтопсэта китыдыйл. Ванты, муң щита анта туп ёнтам луматсохлуд альлуд, щи тумпийн уталтыты харат лэщатлуд, па ёх элты уталтылуд. Марий Эл мувев – ун, щипн арсыр тахаютн еша па хорпи ернасат ёнтлайт, туп кашң хоят лув итэда ёнтад. Ванты, муң куртэва ики па район элты мари ими тус ки, лув щиралн луматсохат ёнтад – муңева имохты ныда, муйсыр мув суңев элты имел тусды.

Ванлтопса порайн арталаты ёх туса нох вантлат, муй щирн кашң луматсох ёнтман ул. Лыв туса ёнтты имет пирылат, щалта ишакты нэпекатна тынаң мойлапсайт мойдалат.

– Нови щашкан элты ёнтам ернас – щит там йис щирн муй катра щирн ёнтам ернас?

– Йис пора вуш элты нови щашкан элты луматсохат ёнтсайт. Ма холна нумлэм, муй щирн аньтем-ащем нови ернасатн торн сэварты муй па рупата верты яңхсат.

Там йисн па ольпаң щашканат элты ернасат ёнтты питсув. Щи тумпийн имет арсыр хорамат тайлат, ит – щит ший аршаш – щит нын ханты мيران иты сак кел хорпи хорамот, щита сак юкана щел охат ёнтлайт.

Интам муң мувевн худам студия хот рупитл, щита ох онтасн мари мир катра муй па там йис ернасат ёнтлайт. Хунты Шоруньжа курта Марий Эл мувев культура верат туты министр ху Константин Анатольевич Иванов ёхтыдыйс, мари мир ернас ёнтты партас. Ун куцайт рут мирэл луматсохатн



Хор: Людмила Шульгина

яңхлат ки, айдат ёх ищи лыв педаел вантман тайты питлат.

Ям арат тал ёхлы режиссёр нэ Инесса Куляжева мари мир элты «Юмо хоца ма юшем» нэмпи кина верас. Лув муңев вохсалды, муң щита мари мир улапса, йис верат, пойкщаты верат альсув, арысув, нарассув па яксув. Ма нумлэм, щит луң пора ус – йи хатлан хатлаң хатл ус, щалта ертаң хатл, елды аня лыплат щёрхатсат – хорамаң кина тыйс. Там кина Марий Эл волаң Йошкар-Ола вошн, елды Шоруньжа куртан кулуп хоца вантсув, ин Интернет хоца щи кина ул. Муң вохлаюв ки, имохты яңхлуд. Муң иса муй верлуд, лудн мари мир йис верат елды туты па няврэмат уталтаты.

– Нын «Муро сем» тахая яңхты эвет-похат мари ясаң тайлат?

– Па муй. Ёлн аньтидалащилал дыв пилэлн туп мари щирн потартлат, щи тумпийн ашкудайн лапат сыс кат щёс «Мари ясаң» урок ул. Лыв рут ясаңан потрат ханшлат, елды экзаменат малат.

Людмила Шульгина
ханшам потар



Хор: Людмила Шульгина

Газета

«ЛУХ АВТ»

Адрес редакции:
629003, ЯНАО,
г.Салехард,
мкр. Богдана Кнуянца,
д.1, каб. 106
(34922) 4-68-63

E-mail:
luh.avt@yamal-media.ru

Учредитель

Департамент внутренней политики
Ямало-Ненецкого автономного округа
(629008, ЯНАО, г.Салехард, пр-кт Молодёжи,
д.9, каб.708)

Газета зарегистрирована

Управлением федеральной службы по надзору
в сфере связи, информационных технологий
и массовых коммуникаций по Тюменской
области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1340 Заказ 1553

Подписные индексы:
на год – ПА700, на полугодие – ПР561

№ 43 (1242)

Газета вышла в свет 24 октября 2024г.

Подписано в печать 26 октября 2024г.

по графику: 16.00

фактически: 16.00

Газета выходит по субботам

Цена годовой подписки 88 руб.,
в розницу не распространяется

Издатель

Департамент внутренней политики ЯНАО
(629008, ЯНАО, г.Салехард,
пр-кт Молодёжи, д. 9, каб.708)

Отпечатано в АНО «Ямал-Медиа»
Юридический адрес: 629003, Ямало-
Ненецкий автономный округ, г. Салехард,
мкр. Богдана Кнуянца, д.1, каб. 106

Фактический адрес: 629007, Ямало-
Ненецкий автономный округ, г. Салехард,
ул. Чубынина, 39А

Генеральный

директор
АНО «Ямал-Медиа»
Зулинова
Марья Андреевна

Главный редактор

Яковлева
Алина
Кирилловна